

# 1 JUAN

## Juana huakkuruda o'nigmadoya'uyate.

**Cristo Diosen Huasi'po oro'taj onte'ti o'manoeahuahuika'apo.**

**1** <sup>1</sup>Opudomeytaj o'nigmadoya'ne. A'nennada Cristo o'noika'uyate. Huadari kurudere kahued ee'te o'uyate.

Ke'na e'manmadika'te o'pee'uy. Kentaj o'tiahuay'uy. Kentaj huaso'teda huaba'a oroa o'tibata'te'e'uy. Ke'na oro'taj onte'ti mo'noeahuahuika'apone. <sup>2</sup>Cristo Diosen huamanoeahuahuika'eri o'si'po'e'uyate. E'kerekdte'te oroa o'tiahuay'uy. Ke'na Diosen Huasi'po o'e buttida o'nona'ne. O'noeahuahuika'po Apag Diosere o'ika'uyate. Diosa Cristotaj bo'tiahuay'ea'uyne. <sup>3</sup>Oro' Diostaj Jesucristotaere oknopoika'nig oro'ere konigti Diostaj moknopoike'po kenpa'ti oro'ere konigti Diosen Huasi'po Jesustaj moknopoike'po kenda o'tiahuayika'uynig kenda o'peika'uynig o'nonbatia'pakne. <sup>4</sup>Kenpa' Jesustaj on'timadoya'ne doere huakka' mon'durupakika'.

**Dios jeynada o'ika'.**

<sup>5</sup>Dios jeynada o'epo huadakda o'e. Diosa sigpi' dakhuea' kahue' o'ika'. Kenda Diosen Huasi'po Jesucristoa monmadika'uyne o'peepo, opudomeytaj o'nonbatia'pakne. <sup>6</sup>Oro'omey dakhuea'da e'kika'nayo

“Diostaj oknopoepo Jesúsen huadi' o'ey,” ea'nayo, da oa'po, dakhuea' o'kay. <sup>7</sup>Konig Dios huakjeyonig o'epo huadakda o'kika'nig oro' kenpa'ti Diosen huadakda e'kika'nayo nogere nogere durugnada Diostaj oro' oknopoika'po o'ene. Kenpa'ti Cristo Diosen Huasi'po mo'nigbuey'uyatenok aya'da dakhuea' e'ka' mo'nopo'tihueka'ne oro'en dakhuea' e'ka' mo'nopo'tihueka'ne.

<sup>8</sup>“Do dakhuea' kahue' ijje,” oro' ea'nayo huata'da nama'da o'huaa'po oay. Cristotaj oknopoehue' o'ey. <sup>9</sup>“Dakhuea' ijkamey. Bekkahuea', Apag Dios.” Oro' e'tiona'pakika'nayo Dios huadakda o'epo buttida huaa'eri o'epo mo'nopo'tihueka'apone oro'en dakhuea' e'ka' bokkahuea'apone. <sup>10</sup>“Do dakhuea' kahue' ijjemey.” Oroapi' ea'nayo Dios da huaa'eri o'e o'huaa'po Diosen huaa' hueretda okiehued o'ene.

**Cristo oro'en huamanopo'tihueke'eri mo'taene.**

**2** <sup>1</sup>Dakhuea' kikhue' ka'nike'po opudomeytaj on'nigmadoya'ne, sion. Dakhuea' eka'nayo Jesucristo huadakda o'epo Diostaj nigtiona'pakdik mo'epo dakhuea' e'ka' yanopo'tihueka' mo'nigtiona'pakapone. <sup>2</sup>Oro'en dakhuea' e'ka'taj Jesucristoa mo'nigbuey'uypo mo'nopo'tihueka'ne.

Cristo oro'en dakhuea' e'ka'taj kenpa'ti aya'enda dakhuea' e'ka'taj mo'nopo'tihuekea'ne.

<sup>3</sup>Diosen hua'a oro' e'nigpeika'nayo Diostaj oknopoe'epo Diosensi'po o'ey daka' o'nopoene. <sup>4</sup>"Diostaj yoknopoe'y." Be'api' ea'nayo Cristoen hua'a nigpeehue' e'cada da huaa'eri o'epo Diosen hua'a nopoe'hue' o'e.

<sup>5</sup>Be'api' Cristoen hua'a o'nigpeika'po, o'kika'po, Diostaj nogiti nogiti di' o'ene. Kenpa'ti Diosensi'po o'ey o'nopoene.

<sup>6</sup>"Diosensi'po ijje'y." Oro'omeya' ea'nayo konig Jesucristo o'kika'uynig konigti mog'kika'.

**Di' yan'maika' Juana  
huaboa'da o'mana'.**

<sup>7</sup>A'nenda di' yan'maika' Cristoa o'mana'uyatenok mo'pee'uy. Konig a'nenda o'mana'uyate konigti o'nona'po o'nigmadoya'ne, egomey, pogomey. <sup>8</sup>Huayahuaya di' yan'maika' onte'ti o'nona'ne. Cristo aratbuttaj di' o'maika'uyate kenpa'ti oro'omey huayahuaya di' mon'maika'. A'nenda konig sikkiregya' nopoe'hue' mo'epo dakhuea' bokika'uyatenig'a oynayo konig huakjeyyo huaboa'da Cristotaj moknopoe'epo huadakda bokika'.

<sup>9</sup>"Huakjeyyo ijje'epo Cristotaj yoknopoe'epo huadakda ijkikay," be'api' ea'pi' nog huaknopoe'eritaj o'diaypo nama'da oa'nig'a Cristotaj oknopoe'hue' o'epo sikkiregyo o'e. <sup>10</sup>Be'api' nog huaknopoe'eritaj huadi'da o'epo huadak o'kika'. Nama'da kikhue' o'eapo. Diostaj huadakda o'kika'apo. <sup>11</sup>Be'api' huaknopoe'eritaj o'huadiaypo dakhue'da o'epo konig sikkiregya' dakhuea'da o'kika'. Nama'da o'kika'po konig ekpobigonig o'epo Diosen hua'a nopogkahue' o'e.

<sup>12</sup>Opud Cristoen huaknopoe'eri dakhuea' e'ka'taj Jesucristoa mo'nigbuey'uyo

mo'manopo'tihuekea'deme'nok opudtaj on'nigmadoya'ne. <sup>13</sup>Cristo a'nennada o'noika'uyate. Aya'da o'tiahuayika'nig o'ka'uyate. Opudomey tone'bokerek Jesucristoen huaknopoe'eritaj on'nigmadoya'ne. Toto'taj nigpeehue' mo'ika'po dakhuea' kikhue' mo'ika'nok opudomey huabokerek ettone'eretaj on'nigmadoya'ne. Apag Diostaj moknopoenok opudtaj on'nigmadoya'ne, sion. <sup>14</sup>Cristo huakkurueri huanoeonhuahuika'eritaj opud huaknopoe'eritone' moknopoe'ene, do'hued huaojonigtaj on'nigmadoya'ne, pag. Opudomey huabo huaknopoe'eri Diosen hua'a huanopoya' moknopoika'po teyda mo'epo toto'taj nigpeehue' mo'ika'ne. Opudomeytaj on'nigmadoya'ne.

<sup>15</sup>Konig aratbut oknopoe'hue' huae'eri dakhue'da o'nika'nig konigti ehue' yanika'. Konigti pakhue' yanika'. Konig nama'da ogkika'nig kahue' yanika'. Konig nama'da on'nopoika'nig nopoe'hue' yanika'. Konig nogomey katetapi' on'eretpakika'nig eretpakhue' yanika'. E'eretpakika'nayo Apag Diostaj pakhue'dik mo'ene. <sup>16</sup>Kenda aratbut oknopoe'hue' huae'eri on'nopoepo ogkika'nigtaj Dios kenpa' pakhue' o'e. Huakka' dakhuea' e'ka'ta' o'deretpakika'. Katetapi' huakpoa o'tiahuaypo o'deretpakika'. Huata'da di'nada o'nika'. Ayada dakhuea'da on'nopoepo ogkika'.

<sup>17</sup>Aya'da katetapi' nama'da ogkika'po, aya'da nama'da on'nopoepo ken konig ehue' o'eapo. Aya'ada dakhuea' e'kata' o'deretpakika'nig ehue' o'neapo. Diostaj huanigpeika'erinayo onte'ti Diosere on'noeonhuahuika'apo. Okbatikhue' on'noeonhuahuika'apo.

**Jesús en hueretda huaknopoe'eri  
buttida hua'a on'nopoika'. Jesús  
ehue' o'e Diosen Cristo. Da huaa'eria  
kenda nama'da on'manmadikika'.**

<sup>18</sup>Kene'huaya' huame'noe o'edeapo. A'ti Cristo o'tiakapo. Cristoen taka'

huairi o'tiakapo mo'tipeeme'ne. Ken Cristoen taka' huakka'da on'tiakdeme'. Kena'po kene'huaya' huame'noe o'epo a'ti Cristo o'tiakapo o'nopoene.

<sup>19</sup>Cristoen taka' huamanmadika'eri a'nenda oro'omeyere e'nika'ada konig oro' Cristotaj oknopoe'po kenomey oknopoe'hue' o'nika'po on'bakhuame'. A'nenda kenomey konig oro' eknopoe'ika'nayo oro'ere o'nika'po bakhuahue' mo'eaymet. Kenomey on'bakhuame' kena'po konig Cristotaj o'nigpee'nig oro', kenomey nigpee'hue' o'ne, o'nopoene, sion.

<sup>20</sup>Opodomeytanayok Cristoa Diosen Nokireg bo'yokunok Diosen buttida hua'a mo'nopoene. <sup>21</sup>Kena'po buttida hua'a nopoe'hue' mo'enok onahue'dik ijje. Buttida hua'a opud mo'nopoenok on'nigmadoya'ne. Be'api' da ea'nayo buttida hua'a ehue' o'e.

<sup>22</sup>Konig da huaa'eri o'ne onona'apone. Jesús Diosen Huasi'po ehue' o'e ea'nayo da huaa'eri o'ne. Cristoen taka' o'ne. Apag Diostaj oknopoe'hue' o'ne. Diosen Huasi'potaj oknopoe'hue' o'ne. <sup>23</sup>Jesús Diosen Huasi'po ehue' o'e. Aya'ada kenda ea'nayo Apag Diostaj oknopoe'hue' o'ne. Jesús Diosen Huasi'po o'e. Aya'ada ea'nayo Diostaj o'noknopoe.

<sup>24</sup>Kenda a'nenda huakkuruda Jesucristoen huadak hua'a mo'peeonhua'uynigtaj daka' ya'noknopounhuahuika'. Kenda huakkuruda mo'peeonhua'uyate eknopounhuahuika'nayo Diosen Huasi'potaj mo'nopo'toeonhuahuika'po kenpa'ti Apag Diostaj moknopoeonhuahuika'. <sup>25</sup>Kenpa'ti Cristoa mo'noanhuahuika'apone Cristoa mona'uyne.

<sup>26</sup>Opodomeytaj da huamanmadika'eritaj on'nigmadoya'dene. <sup>27</sup>Jesús Diosen Nokireg bo'yoke'uyunok

mo'nopo'toe'po buttida hua'a okie'dik mo'ika'ne. Diosen Nokirega aya'da mo'nopoea'ika'ne. Buttida hua'ayo'da mo'nopoea'po da nopoeahue' mo'ene. Konig mo'nopoea'ika'nigtaj Cristotaj daka' ya'noknopoe'ika'.

<sup>28</sup>Oy Cristotaj daka' yanoknopoe'ika'po Cristo e'tiakte daka' moknopoe'po me'pukhue' mo'eapet kenpa'ti birahue' mo'eapet, sion. <sup>29</sup>Cristo huadakda o'ika'po Diosen hua'a o'nigpe'ika'po sigpi' dakhuea' kahue' o'ika'. Kenda opud mo'nopoene. Kenpa'ti aya'ada huadakda ogkika'po Diosen hua'ataj on'nigpe'ika'po Diosensi'po o'nede mo'nopoene.

#### Diosensi'po o'ene.

**3** <sup>1</sup>Apag Diosa oro'omeytaj huakka'da di' mo'ene. Huakka' di' mo'epo, "do'huedsi'po mo'ene," mona'ne. Huakka'ada Diostaj oknopoe'hue' o'nepo oro' Diosensi'po o'enig sigpi' okie'hue' mo'ene. <sup>2</sup>Oyedda Diosensi'po o'ene. Monig o'eapet nopoe'hued o'ene. Jesucristo e'tiakde'te oro'a o'tiahuaydepo konigti o'eapone, huadi'da egomey. <sup>3</sup>Cristonigton e'dik ijjeapoy, aya'ada kenda on'nopoe'po konig Cristo Diosen hua'a o'kika'uyunig, huadaky'o' o'kika'uyunig dakhuea' kahue' o'ika'uyunig konigti kagkike'.

<sup>4</sup>Aya'ada dakhuea' ogkika'po Diostaj nigpee'hue'da o'ne. Dakhuea' e'kika' konigti Diostaj nigpee'hue' ee' o'e. <sup>5</sup>Aratbuten dakhuea' e'ka' a'bakkahueaya'po Jesucristo aratbutte o'tiakuyate, mo'nopoe'de. Diostaj o'nigpe'ika'uyate. Jesús sigpi' dakhuea' kahue' o'uyate mo'nopoet. <sup>6</sup>Aya'ada Jesucristotaj o'noknopoe'po on'nigpe'ika'po Diostaj dakhuea' kahue' o'nika'. Aya'ada Diostaj nigpee'hue' huae'erinayo Cristotaj okie'hue' o'nepo kenpa'ti Cristotaj nopoe'hue'da o'ne. <sup>7</sup>Nama'da da huamanmadika'eritaj

peehue' yanika', do'hued sionomey. Konig Cristo Diostehuaapa' huadak o'enig konigti aya'ada Diostaj on'nigpeika'po Cristonigda huadakda o'ne. <sup>8</sup>A'nennada huakkurutedda toto' nama'da huamana'eri o'epo huaboa'dakon Diostaj nigpeehue' o'eonhuahuika'nok aya'da Diostaj nigpeehue' huae'eria toto' huairien huanaba' o'ne. Toto'a dakhuea' o'bakika'nigtaj da o'manika'nigtaj a'batikaya'po Diosen Huasi'po o'tiakuyate.

<sup>9</sup>Aya'da Diosensi'po Diosa o'nopo'toika'nok Diostaj dakhuea' kahue' o'nika'. Diosensi'po o'nepo nigpeehue' ehue'dik o'nika'. <sup>10</sup>Diostaj nigpeehue' huai'ka'eri Diosensi'po ehue'da o'ne. Nog aratbuttaj di' ehue' huae'eri Diosensi'po ehue'da o'ne. Kenda o'nopo'epo Diosensi'potaj makia'dik o'ene oro'. Aratbut toto' nama'da huaa'eriensi'po o'ne makia'dik o'ene oro'.

**Huayahuaya di'da mon'maika'po huadak e'kika' mon'batihuapokika'.**

<sup>11</sup>Huayahuaya di' mon'maika'. Kenda hua'a oro'a a'nennada o'peunhuahuika'uyne. <sup>12</sup>Konig Caín kikahue'dik o'ene. Caín toto'en o'epo toto'taj o'nigpeepo huama'buytaj o'huadiaypo o'arakuyate. Diostaj nigpeehue' o'epo dakhuea' o'ka'uyate. Ke'nen huama'buy huadakda o'ka'po Diostaj o'nigpeenok Caína o'arakuyate. Konig Caín kikahue' mo'nika'.

<sup>13</sup>Opuda Diostaj mo'nigpeika'nok Diostaj pakhue' huae'eria opudtaj e'huadiaynayo mepukehue' yanika', do'hued egomey. <sup>14</sup>Oro' toto'en e'kika'tada Diosa mo'nopo'noeame'nok oy Diosen o'ene . Nog huaknopoe'eritaj di' o'epo kenda o'nopo'ene. Kenomey nog aratbuttaj di' maehue' o'nika'po toto'en ogkika'po Diosen ehue'da

o'ne. <sup>15</sup>Aya'ada nog aratbuttaj huabahuadiayeri konig huabarakeri o'ne. Huabarakeri Diosere onte'ti noeonhuahuikahue'dik o'neapo. <sup>16</sup>Jesucristo huakka' oro'taj di'nanada mo'epo a'nopo'yareaya'po o'pakpo mo'nigbuey'uyne o'nopo'ene. Kena'po oro'en huama'buy huaknopoe'eritaj huakka' di' mo'nepo huadaky'o' e'kika' mantihuapokika'dik o'ene. Konig Jesús huakka' di' mo'ene konigti huama'buytaj diga'da di'nada ika'dik o'ene. <sup>17</sup>Oro'omeyapi' aypo o'toepo nog huaknopoe'eri huama'buy aypobayo' ee'te e'tiahuayada sue'nopo'da o'epo sigpi' yokhue' ee'nayo Diostaj di' ehue'dikda o'ene. <sup>18</sup>“Nogtaj di' mon'mae,” oro'a ea'nayo hueretda di' o'maepo mon'batihuapokika', aypopi' mon'bayokika'.

**Diosen hua'a e'kika'nayo Diosensi'po o'ene daka' nopoika'dik o'ene.**

<sup>19</sup>Oro' nog aratbuttaj di' o'ika'po buttida hua'a o'nigpeika'po Diosensi'po o'ene nopo'e'dik o'ene. <sup>20</sup>Nama'da ijkay huanopoya'da oro' e'nopo'eyayo Dios huahuakda o'epo aya'da o'nopo'epo okkahuea'dik mo'ene. <sup>21</sup>Diostaj o'nigpeikay oro' huanopoya'da e'nopo'eyayo Diosensi'po o'ey daka' nopoika'dik o'ene. <sup>22</sup>Diosen hua'a o'nigpeika'po kenpa'ti Dios o'paknigda o'kika'nok oro' e'tiona'pakte Diosa oro'taj mo'nigpeika'ne, huadi'da egomey pogomey. <sup>23</sup>Jesucristo Diosen Huasi'po o'e. Kenda oknopoe'dik mo'ene. Diosen hua'a kenpa' oa'. Huayahuaya di' mae'dik mo'ene. Diosa kenpa' oa'. <sup>24</sup>Diosen hua'a aya'ada ogkika'po Diosyo o'nika' kenpa'ti Diosa kenomeyennopo'yo o'ika'. Diosen Nokireg oro'taj bo'yokuyapo Dios oro'ere o'ika' o'nopo'ene.

**Nama'da huamanmadika'eri kenpa'ti Diosen huamanmadika'eri o'ne.**

**4** <sup>1</sup>Huakka'da nama'da huamanmadika'eri o'nepo buttida

hua'a Diosa me'no<sup>po</sup>ea' nok buttida hua'a ijmanmadikikay onda'ika'nok menpa' buttida huamanmadika'eri yaneta'po yan'bata'huahuayti'. Menpa'ti Diosen Nokirega ya'manopo'toet yan'bata'huahuayti'. <sup>2</sup>Jesús Diosen Huasi'po o'epo kurudya' o'tiakuyate. Huaso'da o'si'poe'uyate huabokerek. Aya' huamanmadika'eria kenda o'manmadikika'po Diosen Nokirega o'manopo'toepo kenpa'ti Diosen hueretda huamanmadika'eri o'ne nopo'e'dik o'ene. <sup>3</sup>Jesús Diosen Huasi'po ehue' o'e. Kurudya' tiakhue' o'uyate. Aya'da huamanmadika'eri kenda on'manmadikika'po, Diostaj oknopoe'hue'ya o'ne. Diosen Nokireg toehue' o'ne. Cristoen taka' nokireg on'toe. Cristoen taka' nokireg o'tiakapo mo'tipeikame'nig, indariyo aratbutere o'ede, huadi'da egomey pogomey.

<sup>4</sup>Diosensi'po mo'epo Diosen Nokirega mo'nopo'toenok nama'da huamanmadika'eritaj manigpeehue' mo'ika'ne. Diosen Nokireg teyda o'epo huadak e'kika' huakka' tihuapokika'dik mo'ene. Cristoen taka' nokiregnayo teyhue'da o'enok nigpeikahue'dik mo'ene, huadi'da sionomey. <sup>5</sup>Nama'da huamanmadika'eri Cristotaj nigpeehue' o'nika'po aratbutada on'eretpakika'nig on'manbatia'pakika'. Aratbut Diostaj oknopoe'hue' o'nepo nama'da huamanmadika'eritaj on'pakpo on'mapeika'. <sup>6</sup>Oro'omeynayo Diosensi'po o'ene. Diostaj huaknopoe'eri oro'taj daka' mo'nigpeika'ne. Nogomey Diostaj oknopoe'hue' o'nepo oro'taj nigpeehue' mo'ika'ne. Oro'taj huanigpee'eri Diosen Nokireg huanopo'toeritaj makie'dik o'ene kenpa'ti nama'da huamanmadika'eritaj makie'dik o'ene.

**Dios oro'taj di' mo'enok oro'kon  
huayahuaya di' mon'maika'.**

<sup>7</sup>Dios oro'taj di' mo'enok oro'  
huayahuaya di' mon'maika'. Aya'tada

di' huamae'eri Diosensi'po o'nepo Diostaj o'noknopoe. <sup>8</sup>Dios di'nada e'maika'tada be'api di' ehue' e'mae'nayo Diostaj oknopoe'hue' o'ne. <sup>9</sup>Oro'omeytaj kamanoeanhuahuike'po Diosa di' mo'epo ke'nen nogsi'potida indariyo o'ta'mona'uyatenok Dios di' mo'ene nopo'e'dik o'ika'ne. <sup>10</sup>Dios oro'taj di' mo'epo ke'nen si'po oro'en dakhuea' e'ka' kamanopo'tihueke'po o'ta'mona'uyate. Kenda o'ka'uyunig Diosa huakka'nada di' mo'ene o'nopoene. Oro'anayo Diostaj sue'da di' o'ene.

<sup>11</sup>Diosa huakka'da oro'taj di' mo'uyunok huayahuaya di' mae'dik o'ika'ne. <sup>12</sup>Oro' aratbuta be'api Diostaj tiahuahue' e'ika'ada huayahuaya di' e'maika'nayo Dios oro'omeytaj mo'nopo'toika'ne. Diosa di' mo'ika'po mo'nopo'toenok huayahuaya nogitida di' o'maika'ne, huadi'da egomey pogomey. <sup>13</sup>Oro'ennopo'yo Diosa ke'nen Nokireg bo'yokuyunok Diosere o'noika'ne kenpa'ti oro'yo Dios o'ika' daka' nopo'e'dik o'ene. <sup>14</sup>Dakhuea' huaka'eritaj kamanopo'yare'po Apag Diosa Huasi'po o'ta'mona'uyate. Oro'ada Diosen Huasi'potaj o'tiahuayika'uy o'huaa'ikay. <sup>15</sup>“Jesús Diosen Huasi'po o'e.” Aya'ada o'noknopoe'po on'huaa'ika'po Dios kenomeyyo o'ika'. Kenpa'ti kenomey Diosyo o'nika'.

<sup>16</sup>Oro'taj huakka' di' mo'ika'ne Diosa. Daka' o'nopoene. Dios di' mo'enok nogomeytaj di' o'maika'po Diosere o'noika'ne kenpa'ti Dios oro'omeyyo o'noika'. <sup>17</sup>Oro' Diosere o'noika'po oro'yo Dios o'noika'po nogiti nogiti huakka' Diostaj di' o'epo nogok kene'huaya' huame'noete Diosa castiga e'magka'te oro' mididhue' o'ea'pone. Konig Diosen Huasi'po Jesús oro'omeykon di' o'maika'po me'pukhue'dik

o'eapone. <sup>18</sup>Kenda huayahuaya di o'maika'po me'pukhue'dik o'ene. Kenoka' di o'maika'po huadakda o'kika'nig o'nopoepo castiga egka'taj okme'pukhue'dik o'ene. E'me'puknayo sigda di o'maika'nig nokotdik o'ene.

<sup>19</sup>Diosa huakkuruda oro'taj di mo'uynok kenpa'ti Diostaj di o'ene. <sup>20</sup>"Diostaj di ijjej." Oro'api' ea'ada nogomeytaj e'huadiaynayo da huaa'eri o'ey. Diostaj tiahuahue'dik o'epo huama'buytaj e'tiahuyada di ehue' ee'nayo Diostaj sigpi' di ehue'dik o'ey. <sup>21</sup>Diostaj di mo'epo nog aratbuttakon di yan'maika'. Diosa mona'uyate.

**Jesús Diosen Cristo o'etaj  
oknopōepo Diosen Huasi'potaj  
di'da o'ika'po huama'buytaj di  
o'maika'po katetapi' eretpakhue'  
o'ika'po dakhuea' kikahue' o'ika'ne.**

**5** <sup>1</sup>Jesús Diosen Huasi'po o'e, Jesús Diosen Cristo o'epo kurudya' o'tiakuyate. Aya'ada kenda o'noknopōepo Apag Diosensi'po o'ne. Aya'ada Apag Diostaj di o'nepo, Diosensi'potakon di o'maika'. <sup>2</sup>Oro' Diostaj di o'epo Diosen hua'a o'nigpeika'po kenoka' Diosensi'po huaknopōe'eritaj di o'maey o'nopoene. <sup>3</sup>Diostaj di o'epo Diosen hua'a o'nigpeika'ne. Diostaj di o'epo Diosen hua'a daka' nigkika'dik o'ene. <sup>4</sup>Aya'ada Jesústaj o'noknopōepo Diosensi'po o'ne. Jesústaj o'noknopōepo katetapi' eretpakhue' o'nika'po dakhuea' kikahue' o'nika'. Dioseno'da on'pakpo ogkika'. <sup>5</sup>Jesús Diosen Huasi'po o'e. Aya'ada o'noknopōepo dakhuea' kikahue' o'ne. Huakpoa on'tiahuyapo eretpakhue'dik o'ne. Dioseno'da ogkika'.

**Jesús Diosen Huasi'po o'e.**

<sup>6</sup>Jesústaj bautiza egka'te "In do'hued huadi'da huasi'po o'e." Diosa

oa'uyatenok kenpa'ti Jesús e'bueyte mimi o'mimihua'uyatenok Jesús Diosya' o'tiakuy oknopōe'dik o'ene. Diosen Nokireg buttida huaa'eri o'epo "Jesús Diosya' o'tiakuyate," o'huaa'nok Jesús Diosen Huasi'po o'e oknopōe'dik o'ene. <sup>7</sup>"Jesús Diosen Huasi'po o'e," Diosen Nokirega huanopoya'da oa', Diosa oa', kenpa'ti Diosen hua'a oa'. Bapa'a konigti oa'. "Jesús Diosen Huasi'po o'e," oa'. <sup>8</sup>Kenpa'ti indariya' "Jesús Diosen Huasi'po o'e." Diosa bautiza egka'te oa'uyate. Diosen Huasi'po o'epo Jesús o'buey'uy. "Jesús Diosen Huasi'po o'e," Diosen Nokirega oa'uyate. "Jesús Diosen Huasi'po o'e," Bapa'a konigti oa'uyate. <sup>9</sup>Bapa' huabokereka konigti en'huaa'nayo oro' pee'dik e'eada Diosa buttida o'manika'nok oro' nogiti pee'dik o'ika'ne. Jesús do'hued Huasi'po o'e. Diosa oa'nok oknopōika'dik o'ene. <sup>10</sup>Jesús Diosen Huasi'po o'e aya'ada o'noknopōepo buttida hua'a o'e huanopoya'da daka' on'nopōe. "Jesús do'hued huasi'po o'e." Diosa oa'uynig aya'ada oknopōehue' huae'eria "Dios da huaa'eri o'e," on'huaa'ika'. <sup>11</sup>Diosa ke'nen Huasi'po oro'taj bo'yokpo huadakda mo'noeanhuahuika'ne. Onte'ti mo'noeanhuahuika'apone. <sup>12</sup>Aya'ada Diosen Huasi'potaj o'noknopōepo Diosere on'noeanhuahuika'apo. Aya'ada oknopōehue' o'nepo Diosere noehue' o'nika'apo.

**Juana mo'nigmadoya'depo  
mo'boroayne.**

<sup>13</sup>Diosen Huasi'potaj moknopōepo onte'ti Jesúsere mo'noeanhuahuika' kan'nopōepo opudomeytaj on'nigmadoya'ne.

<sup>14</sup>Konig Diosa o'paknig oro'a konigti o'pakpo o'tiona'pakpo Diosa mo'peene daka' o'nopoene. <sup>15</sup>Diostaj o'tiona'pakpo oro'taj mo'peene daka'

o'nopoene. Konig o'tiona'paknigda kenda Diosa mo'nigka'apone. Daka' o'nopoene.

<sup>16</sup>Huaknopoe'eri huama'buya dakhuea' e'kika'nayo Diostaj kenpa'da oknopoebatikhue'da e'kika'nayo kentaj mon'tiona'paknok Diosa o'noeanhuahuika'apo. Huama'buy kenpa'da oknopoebatikdepo kenpa'da o'bueyapo. Kentaj tiona'pakhue'dik o'ene, ijjay. <sup>17</sup>Dakhuea' e'ka' konig Diostaj nigpeehue' o'enig dakhuea'da o'e. Aratbut Diostaj nigpeehue' ee'nayo onte'ti e'nopo'korea'nayo kenpa'da bueyhue' o'neapo.

<sup>18</sup>Aya'ada Jesucristotaj o'noknopoepo Diosensi'po o'nepo dakhuea' kikhue'

o'neonhuahuika'. Jesús Diosen Huasi'poa o'matinoea'ika'. Toto' huairia kenomeytaj engaña magkahue'dik o'e. Kenda oro'omey o'nopoene.

<sup>19</sup>Oro' Diosensi'po o'ene o'nopoene. Aya'da Cristotaj oknopoehue' huae'eria toto' huairitaj on'nigpeika' o'nopoene.

<sup>20</sup>Dios kurudyo hueretda Dios o'e. Kenda oro'taj kanopoe'po Diosen Huasi'po o'tiakuyate o'nopoene. Diosen Huasi'po Jesucristotaj oro' oknopoika'ne. Jesús hueretda Dios o'epo oro'taj mo'noeanhuahuika'ne o'nopoene. <sup>21</sup>Katetapi' eretpakhue' yanika'. Konig dios e'ketkatapi' pakhue' yanikati', sionomey.